



Drummelhund 2026

„Yakschamlar – na sinsin?“ – Jä, wännnd Ihr mi nit verschtoos?
Denn mien halt au Ihr – in d Integrationsschuel goo!
No Afrikaans, au Arabisch wärsch glatt
so verstoot me mi wenigstchens wiider in dääre Stadt

Im Eglisee – do ha n'ych jetzt, bi Gott,
e lääbenslängligs – Huusverbott!
Bi gsprunge vom Dreyer, elegant, grazyy, butzt und gsträält,
und noohär het im Beggi s Wasser gfäält

Ych sag Äxgyysi – vo ganzem Härze,
wills doch mit em Badmeischer nit verschäärze
doch dä deubelet, als hät är e Psychose
und schreyt lut: hey, oobe am dreyer do hängt no di hoose

Dr Diefflieger Sutter us dr Augushtinergass,
glaub däm ziehts bis ins hirni sy ischias
Spinnsch, kaini Drämml meh in dr Inneschtadt?
Denn kasch sicher sy, findet jede oobe e demo statt

Ych darf mi heisse Kätzli in Ussgang go
S isch egal, was im Usswyys duet inne stoo
Aifacher wärs, gäbs nur ei Reegle
Äntwäder du willsch, oder willsch nit go.... Jä drulla....

In Basel isch ebbis los – das isch nit glooge,
EM und ESC – hänn uns s Gäld zur dr Tasche usszooge.
Drzue Wacker Käaskuechli und, Würscht – vom Bell
und jede Daag vor dr Hütte – e neu Baustell!

Weisch nit, wie s Lääbe so tiggt
Und bisch e weeneli aifach gstriggt
Wenn d geege alles bisch – und no vyy meh,
denn haissisch sicher Joel – und kennsch d SVP!

Uff dr Terrasse – bim Papa Joe's oobe,
schießt dr Xhaka dr Vogel ab, lägg mir am tschoope „
Firs Aafyyre het dä Maa e ganz guets Gschpyr
Und mir hän ändlig e geili Maischterfyyr

D Wääge sin am Zyschtig gstriche,
dr Rädäbäng wird uff ufs App ussgiwiche
ibers Comite muesch zerscht e Vyyreschutz lo laufe
Und dä gitt aa: „System-Error! Dringend e Update kaufe!“

D Blaggedde passt, vo mir e grosses Lob
Doch isch dä Binggis äggscht e Zircher, oder gar e Schwob?
Uss em glai Basel kunnt är nit, höscht Digge
Sunnst wurd är statt pfyffe Drooge vertigge
Und uss em grosse ka är au nit sy
Sunnst hät är statt sym Piccolo, e Mässer drby

Santiglaus Du liebe Maa
Hättsch mir au e Grättimaa
Är git mir ein und sait ganz stur
Do hesch di genderneutrali Teigfiguur!

Bim Kübler isch d Uffruehr riisegrooss
Dr Dreykeenigskueche sygi nit famoos
Und die Figure wiescht wie-n-e gruusige Tumoor
Bi ych froh, bi ych nit dinne das Joor

So unter uns – wie isch es in Basel esoo?
Welli Glygge het dr greescht Vortrab do?
D Schmiir, die verteilt vyy Zeedel regional
Das schafft nit mol dr Eric Wääber an dr Grossrootwahl

Wo dr Trump in Alaska – uss em Flieger duet stolpere,
und s Lächle vom Putin – isch nur e ghyychlets Holpere.
Do rief mi Junge querbeet iiber dr Hof: „
Papi, kumm schnäll! Im Fäärnseh lauft wiider – Dick und Doof!“

Jä drulla drulla drulla lalaa
Jä drulla drulla drulla lalaa
Wär nit suuber drumml ka
Hängt sich au kai Drumml aa

